

Wajibkan pengembara luar negara jalani ujian PCR

Saringan demam, ujian air kumbahan pesawat tak memadai

Oleh Suzalina Halid
suzalina@bh.com.my

Kuala Lumpur: Kementerian Kesihatan (KKM) diminta mewajibkan ujian saringan Polimerase-Transkripsi Terbalik (PCR) COVID-19 kepada semua pengembara antarabangsa, termasuk China bagi mengekang penularan wabak itu di negara ini.

Pengembara terbabit perlu menjalani ujian PCR dalam tempoh 72 jam sebelum berlepas ke negara ini dan hanya mereka yang mempunyai keputusan negatif sahaja dibenarkan berlepas menaiki pesawat.

Pakar kesihatan dan virologi berpendapat, dua langkah yang diumumkan KKM sebelum ini iaitu melakukan saringan demam dan ujian air kumbahan pesawat dari China masih tidak memadai bagi mengekang jangkitan wabak COVID-19, yang mungkin disebarkan oleh pengembara dan pelancung dari republik itu ke Malaysia.

Dekan Fakulti Perubatan dan Sains Kesihatan Universiti Putra Malaysia (UPM), Prof Dr Zamberi Sekawi, berkata langkah segera untuk hanya membenarkan pengembara dengan ujian PCR negatif memasuki Malaysia adalah paling praktikal yang boleh dilaksanakan KKM.

Selain itu, katanya KKM juga perlu memastikan pengembara dari China yang ingin memasuki negara ini lengkap divaksin.

"Ini kerana ada laporan yang



Langkah segera membenarkan pengembara dengan ujian PCR negatif memasuki Malaysia adalah paling praktikal. (Foto hiasan)

menyatakan kadar vaksinasi dalam kalangan rakyat China tidak tinggi terutama dalam kalangan golongan berusia.

"Kaedah paling baik ialah periksa keadaan pengembara sebelum mereka bertolak ke Malaysia seperti yang pernah kita laksanakan sebelum ini. Hanya mereka yang negatif ujian saringan-nya untuk tempoh tertentu dibenarkan memasuki negara ini.

"Pengambilan sampel air kumbahan pesawat juga adalah tidak spesifik terhadap mana-mana individu yang membawa virus terbabit, sekali gus ia kurang berkesan.

"Begitu juga dengan saringan demam, pengembara mungkin boleh mengambil ubat ketika dalam penerbangan bagi menurunkan suhu, selain itu terdapat juga mereka yang dijangkiti COVID-19 tidak mempunyai gejala," katanya kepada BH.

Beliau mengulas beberapa langkah terbaharu KKM kelmarin untuk melakukan saringan demam terhadap pengembara di pintu masuk antarabangsa (PMA) dan melakukan ujian air kumbahan pesawat dari China

bagi mengekang penularan wabak itu ke dalam negara.

Ia diumumkan Menteri Kesihatan, Dr Zaliha Mustafa susulan kebimbangan rakyat Malaysia, termasuk pakar kesihatan terhadap keputusan kerajaan China menarik dasar 'sifar COVID-19' awal bulan lalu dan membuka semua kawasan sempadannya mulai 8 Januari ini.

Kes positif di China melonjak

Kebimbangan mereka berikutan kes positif di republik itu yang terus melonjak dengan ada laporan mendakwa hampir sejuta kes baharu dilaporkan setiap hari di negara itu.

Mengulas lanjut, Prof Zamberi berkata, langkah itu bersifat sementara dan hanya sebagai langkah berjaga-jaga berikutan lonjakan kes di China, serta pembukaan sempadan oleh republik berkenaan.

Beliau berkata, bagi kawalan jangkitan COVID-19 secara lokal, orang ramai juga wajar mengamalkan semula pemakaian pelitup muka di kawasan sesak dan tertutup.

Katanya, selain itu, pengam-

bilan sekurang-kurangnya dua dos penggalak adalah langkah terbaik bagi perlindungan, khususnya membabitkan golongan berisiko tinggi.

Bagi Pakar Virologi Universiti Malaya (UM), Prof Dr Sazaly Abu Bakar, pengembara dari China perlu diwajibkan mengambil ujian PCR dalam tempoh 72 jam sebelum penerbangan ke Malaysia.

Beliau berkata, ia membolehkan sebarang kaedah 'kawalan' jangkitan COVID-19 dibuat di negara asal mereka, daripada Malaysia yang perlu menanggung kesannya.

"Walaupun ujian PCR mereka negatif, mereka wajib menjalani ujian PCR sekali lagi apabila tiba di pintu masuk negara.

"Ujian PCR sekarang boleh dapat keputusan seawal tiga jam. Kita perlu aktifkan semula langkah ini.

"Sementara menunggu keputusan ujian, pengembara tidak perlu dikuarantin, sebaliknya kita hanya perlu mengambil maklumat diri mereka seperti nombor telefon dan alamat bagi memudahkan untuk dihubungi kelak.

"Jika ujian positif, kita maklumkan kepada mereka dan mereka perlu mengambil langkah sepatutnya bagi melindungi diri dan orang lain," katanya.

Beliau juga berpendapat, saringan demam dan ujian air kumbahan dari pesawat tidak perlu dilaksanakan kerana ia tidak berkesan berdasarkan situasi semasa.

"Saringan demam dahulupun tidak berkesan, tambah lagi sekarang. Kebanyakan jangkitan tidak semestinya diikuti dengan demam.

"Kalau uji air kumbahan dan didapati positif, apa yang kita boleh buat? Takkan nak panggil semula semua penumpang dalam pesawat, ia tidak praktikal," katanya.